

Htawm tem' Petru' ok' leual'

¹ Htawm ti ok' aen' na ko', meuh ui' Si'mon Petru' meuh mhai' meuh peue caee Eun Yesu' Hkrit,

ui' tem' ri tuil' a ri peue pun ri rap ri ti hk'a' yum' ngos heun' na' ce seun' ui' ri pun ui' ri rap ri ti a hk'a' naee hk'a' leupaws seumeu' Eun Yesu' Hkrit meuh Peucawo' Cawo' htut e' na' Eun.

² Kah mun' sin' mae' hk'a' kuit nyawk' kuit sam'ran cumyen' na' kue' hk'a' pang pe' htonnuk ri yawng pe' Peucawo' Eun mae' Yesu' Cawo' Peucawo' e' na' Eun reu'.

Tang' hpum' ri seun' Peucawo' Eun

³ Ti'ca Eun Peucawo' na' tuil' a ku' lo' e' cang yeuh e' kaw a'yu im' hk'a' naee hk'a' Eun Peucawo' na' ku' ceu ka hawc' ri yawng e' Cawo' klawng ri ti e' ri munhpung' mae' ku' chak' ri na' Eun. ⁴ Eun cu awn' na, Eun tuil' kati keuting ngos heun' ri na' ri e'. Punta kopti meuh a kati aen' ce, pe' na' pun ri lec hk'a' naee ruprang Eun Peucawo' na' mae' pun ri pon hk'ai' ku' hk'aw'jeuk ka bhen' keute' ku' lih neum ta' nha' rai na'.

⁵ Kop awn' na, sae' caee co'ca' ri bae' hk'a' yum' na' ri hk'a' chak' na', bae' hk'a' chak' na' ri cu'yi na', ⁶ bae' cu'yi na' ri hk'a' pe tu' ri na', bae' hk'a' pe tu' ri na' ri hk'a' yeun' hkam na', bae' hk'a' yeun' hkam na' ri hk'a' a'yu im' hot' hk'a' Eun Peucawo' na', ⁷ bae' hk'a' a'yu im' hot' hk'a' Eun Peucawo' na' ri hk'a' leumeus' keus ec'awng' ri na', bae' hk'a' leumeus' keus ec'awng' ri na' ri hk'a' leumeus' keus na' reu'. ⁸ Kopti pe' lawn kue' ceu nang aen' ce lheu' heun' ko', a kaw yeuh pe' kue' mun', pli' heun'

hk'a'naee yawng pé Cawó Yesú Hkrit e' ná Eun. ⁹ Daecti a'nhaw' lawn un' kue' ceu nang aen' ce ko', ce meuh peue sai' ngai' un' lang', peue ngai' fec'. Map' ce ná pun a ri saic' ri seunga' hawc' leumah' ná ce ku pil a yeut.

¹⁰ Kop awn' na ec'awng' uí' ná pé', sae'caee' yeuh a kuing'hpaw maeé' Peucawó klawng leuk Eun ri ti pé' neumneum ná reu'. Kopti pé' lawn yeuh keutit' ko', pé' hkuin' kaw duing htang'meul saec' ti pok. ¹¹ Pé' kaw pun hk'a' ren'kawn rap ri ti ri lec hk'a'naee kuing' cot'cu Eun Yesú Hkrit Cawó Peucawó Cawó teum'kawm htut e' lawtpon ná Eun. ¹² Kop awn' na, pé' saec' ná yawng lawng aen' a, pé' jhawp' ku' leupaws seumeu' ná keutawn', daecti punta kaw pé' kuit rot ri ka ná, uí' kaw sae'caee' tuil' sati pé' laleung. ¹³ Ko' uí' ri sawl' pé' ri lawng aen' a cu yam kawn' a'yu im' uí' nang tu' ri ná, uí' kuit a ná' chak'. ¹⁴ Kopti yawng uí' un' ling' ko' kaw uí' pun ri hk'akcak' tu' ri aen' na hot' seun' ku' Cawó e' Yesú Hkrit tuh' Eun uí' nyu a glih'gleueng' hawc' ná. ¹⁵ A saec' ná meuh yam hawc' yeum uí' heul' ná ko', punta kaw pé' cang kuit rot ri ceu nang aen' ce laleung ná, uí' kaw co'ca' ri yeuh a ku hk'a' ka.

Munhpung' Eun Yesú'

¹⁶ Yam lah' ye pé' mhawng' lawng tí'ca Eun Cawó e' Yesú Hkrit ná maeé' lawng kaw Eun tang lih ná, ye hkuin' yeng ri seukawp ri lah' yeuh a pucti lih. Daecti meuh ye sa' hki' nang pun ri nyu munhpung' keuting Eun ná ri ngai' ri ná. ¹⁷ Kopti pun Eun ri rap ri ti munhpung' ri neum A'kuiing' Peucawó Eun yam lah' Eun a ri Heun, "Peue aen' meuh Eun Kon' ai' leumeus' Uí'. Eun hit' ri hpum' Uí' nyawk'."* ¹⁸ Ye ku pun ri mhawng' leukah' awn' puc a ri

* 1:17 1:17 Mahtae 17:5; Maku' 9:7; Lu'ka 9:35

lih neum kuing' pang maó' na' yam ut' ye maeé' Heun pang gong seunga' chak' na'.

¹⁹ Kop awn' na, e' jaen gawm yum' leukah' ce peue suip leukah' Eun Peucawo' na'. Pe' lawn ti leukah' ku' seun' ceng' hk'a'naee duim' yam un' nang ceng' ka na' maeé' ku' seun' seumeueng' keuting peunngup cawo pucti hk'a'naee hpum' aen' na seucen ko', chak' ka. ²⁰ Hk'a' pang gawm'euc' na', yeuh ri yawng leukah' tamnai hk'a'naee htawm Seunga' Eun Peucawo' na', a hkuin' kue' nang ing' neum kamkuit meun ce peue suip leukah' Eun Peucawo' na' saec' ti duih'. ²¹ Kopti leukah' tamnai ce peue suip leukah' Eun Peucawo' na' a hkuin' ing' neum alo ce peue na', daecti leukah' lih neum Peucawo' Eun ku' Cit' seunga' chak' na' tuh' a hpum' ce ri ka na', ce lah' a.

2

Peue guil ri meuh peue suip leukah' Eun Peucawo'

¹ Seun' peue guil ri meuh peue suip leukah' Eun Peucawo' na' tawn puc ce ri hk'a'naee peue Yu'da na' ce, seura' sangsawn' ku' kleuc' na' ce ku kaw cang pucti hk'a'naee pe' ri yeut. Ce kaw ra ri ti ku' sangsawn' kleuc' cang yeuh ku' lulaic na' ing' lec hk'a'naee pe'. Ce yeuh a rot ti tecla ce Cawo' a'yu Cawo' teum'kawm htut ce lawtpon na' Eun, yeuh ce ki' na' lak' ti ce ku' lulaic na' ing' ri tu' ri na' meun vaeveae. ² Peue kaw hot' hk'a' hk'o'kaic ce na' heul' heun' peue. A yeuh muis ka hk'a' leupaws seumeu' na' lu. ³ Kopti seura' sangsawn' ku' kleuc' na' law' hpa keuting ce na', punta kaw ce koc ri hk'a' pe' na', ce pleng' ku' un' kue' un' meuh na' pucti lih. Leukah' taws' a' mu ri ce na' tuik' a ri pang cing' ce na' ling' ka hawc', hk'a' lulaic na' buih ing' rot a de ce hawc'.

⁴ Kopti Peucawo' Eun hkuin' laee uin' in' hpom yeuh map' na' ce, daecti Eun kaw nyon ce nang keutong' nyarok

nang htawng' duim'lawng na' rot ti seunyi yam taws' a'mu na'. ⁵ Yam htum' Eun peue bhen' keute' un' leupaws seumeu' na' ce leumah', Eun hkuin' lae uin' bhen' keute' na'. Daecti Eun roksa' No'ah ku' paó leukah' leupaws seumeu' ri peue na' eun maeé' peue seubu a' res peue na' ce. ⁶ Punta Peucawo' kaw Eun tuh' e' nyu ku' kaw keut' kue' ri peue un' leupaws seumeu' na' ce na', Eun ciyang veng So'dom maeé' veng Gomorah na' ri dum a meuh peuluing. ⁷ Daecti Eun teum'kawm Law'ta ku' meuh peue leupaws seumeu' na' eun lawtpon. Eun pun ri hkam' hk'a' kuit nyhap' nyawk' na' kop meuh a a'yu im' ce peue un' hot' hk'a' mun' hk'a' sin' na'. ⁸ (Kopti peue leupaws seumeu' awn' pun eun ri ut' maeé' ce, eun pun ri nyu pun ri mhawng' ku' rai yeuh ce na' ku seunyi, a yeuh hpum' leupaws seumeu' eun na' pun ri hkam' hk'a' kuit nyhap' nyawk' na'.) ⁹ Kopti yeuh a keutit' na', Peucawo' Eun ci' kaw teum'kawm peue leupaws seumeu' na' ce pon hk'ai' hk'a' cop'long na' yeuh sa'nhaw' na', Eun yawng a. Eun ci' kaw hk'awng', Eun ci' kaw suip ri ciyang peue un' leupaws seumeu' na' ce yeuh sa'nhaw' heul' rot ti yam seunyi kaw taws' a'mu na', Eun ku yawng a. ¹⁰ Lheú' awn' na, peue cu alo ri hot' ta'nhá' hk'a' nham' keune ri na' ce maeé' peue un' sum' ut' hk'a'ruim ce cawo' kue' an'nya na' ce, Eun jaen kaw ciyang ce. Peue aen' ce meuh peue hpum' cen', mhawng' ri hk'o'cuin. Ce un' nawpsang un' lhat'til ri tivamut' tivana' na' ce. ¹¹ Saec' meuh in'hpom kue' kaw' reng kue' ti'ca keuting hk'ai' ce na', yam tang' ce map' hk'a'pang ce tivamut' tivana' nanggal' Eun Peucawo' na', ce hkuin' lah' ku' un' nawpsang ri ce. ¹² Daecti peue awn' ce un' nawpsang ku' un' yawng ce na'. Ce seun' sat' rai na', ce yeuh yawo ku' yawng ri na' heul'. Ce ing' keut' punta kaw ce pun ri hkam' ku' lulaic na'. Ce kaw pun ri lulaic seun' sat' rai na' neumneum.

¹³ Ku' rai yeuh ce na' a tang keutah ing' ri ce. A saec' meuh peunnyi keuting, ce ren' mae' yeuh ku' ren'kawn pon lheu' na'. Ce meuh vang cat vang bok. Ce yeuh hk'a' ren'kawn ri na' meun hk'a'naee pawe pe' na'. ¹⁴ Hk'a' len'cu na' a nuknhen' sai' ngai' ce na'. Ce hkuin' laee keului' yeuh ri map' na'. Ce cop'long peue hpum' un' keutawn' na' ce. Ce ara ri ta'nha' na'. Ce meuh peue ceu pun hk'a' jha' na'. ¹⁵ Ce tecla hk'a' leupaws seumeu' na', ce hk'uih hot' hk'a' eun Balam kon' eun Beol na'. Balam eun meuh peue ren' mae' ku' mhun' un' leupaws seumeu' na'. ¹⁶ Daecti rawngla na' a is' eun. Rawngla na' a saec' meuh sat' un' cang leukah' ko', daecti a leukah' seun' peue. A ham' ku' ma'rat yeuh eun peue suip leukah' Eun Peucawo' na'.

¹⁷ Peue awn' ce seun' keutui' leuum' hit' na' mae' putum' guil' puing' ka heul' na'. Vang duim'lawng na' rangraen a ri uin' ri pun ce hawc'. ¹⁸ Kopti lah' ce leukah' lhung' leukah' keuting un' kue' peuehot' na'. Ce lo' ta'nha' nham' keune ce peue map' leupeul na', ce cop'long peue kawn' pucti lih hk'ai' muk ce peue a'yu im' rai na'. ¹⁹ Ce tuil' kati ri peue awn' ce, "Hpaw pe' ca' kaw laee meuh mhai'", daecti tu' ce na' kawn' meuh ce mhai' ka ku' hk'aw'jeuk na'. Kopti keunhaw' na' a lawn u'peung a'nhaw' ko', hkawn' kaw eun meuh mhai' ka. ²⁰ Ce saec' pun ri pon hk'ai' ku' hk'aw'jeuk ka bhen' keute' na' ri yawng ce Yesu' Hkrit Cawo' Peucawo' Cawo' teum'kawm htut e' lawtpon na' Eun, daecti ce lawn tang ing' lec a bae ko', yam hk'a' pai' ce na' a jaen kaw lheu' hk'ai' yamla ce ri na'. ²¹ Ce lawn na' un' yawng hk'a' leupaws seumeu' na' ko', na' a chak' hk'ai' yawng ce a, hawc' ko' ce tang hpawt' ri eung' kui' ri ri leukah' ti'ca keuting seunga' chak' Eun Peucawo' ku' suip ri ing' rot ri ce na'. ²² Ce ri ko', seun' ce leukah' nang kawt lah' ri aen' a neumneum, "So' na' aw ka a tang hk'a ri na', lic hawc' huim' peue na' a tang heul' luih

ri bae.”

3

Seunyi Eun Peucawo'

¹ A'mawo leumeus' ui' na' pe', htawm aen' meuh a htawm tem' ui' ri tuil' ri pe' la' ok' ti ok'. Tem' ui' ri tuil' htawm la' ok' aen' a ri pe' na' a meuh punta kaw a sawl' pe' kuit rot ri hk'a' leupaws seumeu' na'. ² Ui' sum' kah pe' kuit rot ri leukah' lah' ce peue suip leukah' Eun Peucawo' seungá chak' leumah' na' ce, maeé sum' kah pe' kuit rot ri leukah' Eun Peucawo' Cawo' teum'kawm htut e' lawtpon ku' cu Eun peue caee Eun Yesu' ce lah' a na'.

³ Nanggal' ka na', kaw pe' htuk' ri yeuh ri yawng, cu yam vang tisu' na', kaw a kue' peue cang chaw hkamram peue maeé peue hot' ri yeuh hk'a' ta' nha' rai ka jawngkuí tu' ri na'. ⁴ Ce kaw lah', "Kati lah' ri uin' ri lah', 'Yesu' Eun kaw tang lih' na', ui' nawk a? Ling' ka hawc', tang' neum a'ta' a'ya e' na' yeum ce heul' na', ku ceu gawm'euc' na' a kaw'n' meung seun' ri yam bhen' keute' na' tang' a ri hpanpleng' ri na'." ⁵ Daecti ce guil ri pil lawng aen' na, tang' neum leumah' pang maó na' kue' meuh a kopti leukah' Eun Peucawo' na'. Hawc' ko', bhen' keute' na' a lih' neum leuum' na'. Leuum' na' a rop bhen' keute' na'. ⁶ Yam awn' na, leuum' na' a htum' bhen' keute' na', a yeuh bhen' keute' na' lulaic. ⁷ Kopti meuh a leukah' awn' a na', maó maeé bhen' keute' maet' maen' na' a sawn' ri uin' ri meuh pun ku' kaw dum ri ri ngawl, meuh pun kaw ko' yam seunyi kaw taws' a' mu na' maeé meuh pun kaw yeuh peue un' leupaws seumeu' na' ce lulaic.

⁸ Daecti a'mawo leumeus' ui' na' pe', pawlaee va ri pil a, yam ti seunyi Eun Peucawo' na' seun' a ti heng' neum, yam ti heng' neum Eun na' a seun' ti seunyi. ⁹ Peucawo' hpaw Eun ca' yeuh kati ri na' kvai seun' ku' kuit peue ngon' na',

daecti yeun' hkam Eun pun pé. Kopti un' sum' kah Eun peue lulaic saec' ti peue, daecti Eun sum' kah peue taws' hpum' fuin map' ri ku peue.

¹⁰ Seunyi Eun Peucawo' na' kaw a lih seun' peue con' ing' ce yam un' pawn peue kui' ri na'. Kuing' pang maó na' a na' rai' maeé seng' laws' ri. Ku' kue' hk'a' naee keute' na' ce a na' pun ri dum ri ri ngawl. Bhen' keute' na' maeé ku' kue' hk'a' pang ka na' gawm' euc' a na' lulaic heul'.

¹¹ Kopti ku ceu gawm' euc' na' kaw a lulaic yeuh keuti' na', pé ci' kaw htuk' ri meuh peue yeuh sa'nhaw'? Pé kaw htuk' ri a'yu im' hk'a' naee hk'a' seunga' chak' ri maeé a'yu im' hot' hk'a' Eun Peucawo' ¹² yam sum' kah pé seunyi Eun Peucawo' na' rot vaeavae pé buih ko' a na'. Seunyi yam awn' na, maó na' a kaw lulaic ri ngawl na', ku' kue' hk'a' naee keute' na' a kaw naee ri kuc' ha' ka ngawl na'. ¹³ Daecti kopti Peucawo' jhawp' Eun kati ri na' keutawn' na', e' buih ko' maó hk'u' maeé bhen' keute' hk'u' ku' meuh vang ut' ce peue leupaws seumeu' na'.

¹⁴ Kop awn' na a' mawo leumeus' ui' na' pé, kopti buih ko' pé ceu nang aen' ce na', co'ca' pé yeuh Peucawo' Eun nyu pé un' laee kue' vang ri, vang cutyawm' maeé kue' pé hk'a' ren'kawn kuit sam'ran cumyen' hk'a' naee Heun na' reu'. ¹⁵ Kuit rot ri ka reu', hk'a' yeun' hkam Eun Peucawo' na' meuh a punta peue na' kaw peue pun hk'a' htut lawtpon na', seun' awng' leumeus' e' Paw'lu eun ku tem' ri tuil' htawm ri pé ri cu'yi Peucawo' tuil' Eun ri heun na'. ¹⁶ Htawm Seunga' tem' eun na' ku ok' ka, tem' eun lawng seun' aen' a na' yeut. Hk'a' naee htawm eun na', a kue' lawng ku' nyhap' ri yawng na' ngon'. Peue un' yawng meulamlam ri un' keutawn' na' ce ko', ce hpawt' leukah' eun na' seun' hpawt' ce htawm Seunga' ton seubu na'. Ce ti hk'a' lulaic na' ing' ri ti meun.

¹⁷ Kop awn' na a' mawo leumeus' ui' na' pe', kopti yawng pe' lawng aen' a hawc' na', punta kaw peue un' cang cop'long pe' kleuc' hk'a' ri heul' hot' peue un' hot' hk'a' mun' hk'a' sin' na' ce, mae' kaw pe' un' cang hk'ui'c' hk'ai' vang mok' keutawn' ri na', uin' sati ri reu'. ¹⁸ Daecti kah pe' huk'hawn' hk'a'naee mun' sin' Eun Yesu' Hkrit Cawo' Peucawo' Cawo' teum'kawm htut e' lawtpon na' Eun, mae' kah pe' gawm yawng Eun sae'caee' heun' reu'. Kah Eun kue' munhpung' maet'maen' rot ti cot'cu ri reu'. Amin.

Plang
The New Testament in the Blang language of Myanmar

copyright © 2021 Wycliffe Bible Translators, Inc.

Language: Plang (Blang)

Contributor: Wycliffe Bible Translators, Inc.

All rights reserved.

2021-04-06

PDF generated using Haiola and XeLaTeX on 10 Sep 2021 from source files dated 10 Sep 2021

0468b0b5-acb2-59c4-92d3-4fa09a4d091c